



Sumáriu Kazu
Tribunál Distritál Dili
Outubru 2021

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 12

Artigu	Tipu kazu	Númeru
Artigu 145 Kódigu Penál (KP)& artigu 2, 3 no 35(b) Lei Kontra Violénsia Doméstika (LKVD).	Ofensa ba integridade física simples ho natureza violénsia doméstika no tipu ilizitu sira kona-ba violénsia doméstika nian.	9
Artigu 177 KP	Abuzu seksuál ba menór	1
Artigu 260 KP	Danu ho violénsia	1
Artigu 157 KP	Ameasa	1
Totál		12

1. Totál desizaun ne'ebé JSMP monitoriza: 8

Tipu pena	Artigu	Númeru
Pena prizaun	Artigu 66 KP	1
Pena multa	Artigu 67 KP	3
Omologa dezisténsia keixa		1
Suspensaun ba prizaun nia ezekusaun	Artigu 68 KP	2
Pena admoestasaun	Artigu 82 KP	1
Totál		8

3. Total kazu sira ne'ebé adia tuir JSMP nia monitorizasaun: 0

4. Totál kazu sira ne'ebé sei kontinua prosesu tuir JSMP nia monitorizasaun : 4

B. Deskrisaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0109/20.LBZT

Kompozisaun Tribunál : Singular

Juis : Dr. Argentino Luisa Nunes

Prokuradór : Dr. Luis Hernanio Rangel da Cruz

Defeza : Dr. Juvinal Y. Freitas

Desizaun : Pena admoestasaun

Iha 1 Outubru 2021, Tribunál Distritál Dili prezide julgamentu ba krime ofensa ba integridade fízika simples ho natureza violénsia doméstika ne'ebé envolve arguidu JAES hasoru nia feen, iha Munisipiu Likisá.

Akuzasaun prokuradór

Prokuradór akuza katak iha 25 Agostu 2020, iha oras tuku 21:00 kalan, arguidu lori katana taa moskiteiru ida, buli tau bee ida no taa kadeira masa rua, arguidu kontinua buti dala ida iha lezada nia kakorok no tuku dala ida iha lezada nia hasan parte loos. Antes agresaun ne'e, arguidu ho lezada diskute malu kona-ba, arguidu dansa halimar iha uma no bolu lezada atu dansa ho arguidu maibé lezada lakohi, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu konfesa faktu hotu iha akuzasaun no deklarata katak arrepende nia hahalok, di'ak malu ona ho lezada no kazu ne'e sira rezolve ona tuir kultura Timor nian arguidu fó ona osan US\$50.00 no tais ida ba lezada.

Alegasaun finál

Prokuradór iha nia alegasaun haktuir katak, arguidu konfesa faktu hotu iha akuzasaun, arrepende nia hahalok, nune'e atu prevene krime ne'e akontese tan iha futuru husu ba tribunál atu kondena arguidu ho pena admoestasaun.

Enkuantu defeza husu ba tribunál atu kondena arguidu ho pena ne'ebé kmaan ho konsiderasaun sira katak, arguidu konfesa, arrepende nia hahalok, di'ak malu ho lezada no kazu ne'e sira rezolve ona tuir kultura Timor nian.

Desizaun

Depoisde avalia faktu hotu, tribunál prova katak arguidu lori katana taa moskiteiru ida, buli tau bee ida no taa kadeira masa rua, arguidu kontinua buti dala ida iha lezada nia kakorok no tuku dala ida iha lezada nia hasan parte loos.

Bazeia ba faktu provadu hirak ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, di'ak malu ona ho lezada no kazu ne'e sira rezolve ona tuir kultura Timor nian, nune'e tribunál konklui prosesu ne'e no kondena arguidu ho pena admoestasaun.

2. Abuzu seksuál ba menór

Nú. Prosesu : 0034/21.ERSIC

Kompozisaun Tribunál : Koletivu

Juis : Dra. Ana Paula Fonseca, Maria Solan no Dr. Ivan P. A. Gonçalves

Prokuradór : Dr. Simeão Seixas

Defeza : Dr. José da Silva

Desizaun

: Pena prizaun tinan 13

Iha 4 Outubro 2021, TDD prezide julgamentu leitura akordaun ba krime abuzu seksuál ba menor ne'ebé envolve arguidu AdS hasoru lezada PS (idade tinan 11), iha Munisípiu Ermera.

Akuzasaun Prokuradór

Iha loron no data ne'ebé lezada la apuradu, maibé iha Dezembru 2020, bainhira lezada nia aman moras, arguidu uza oportunidade hodi tama ba iha lezada nia kuartu ho obriga hodi halo relasaun seksuál ho lezada, tanba tauk lezada la hato'o ba nia inan aman sira.

Tuir mai iha 15 Abril 2021, lezada toba mesak hela iha kuartu laran, arguidu tama ba hodi dehan "*ita rua halo relasaun seksuál,*" tanba tauk lezada la responde buat ida, nune'e arguidu hasai ho obrigatoriamente lezada nia rupa no ho obriga halo relasaun seksuál ho lezada. Aktu ne'e rezulta lezada sofre moras iha ninia orgaun seksuá.

Prokuradór akuza arguidu kontra artigu 177 (1) kona-ba krime abuzu seksuál ba menór ho moldura penal tinan 5 to'o tinan 20 prizaun

Produsaun ba prova sira

Iha prosesu julgamentu arguidu hili direitu nonook. Enkuantu lezada konfirma faktu hotu iha akuzasaun.

Testemuña JS nu'udar lezada nia aman, depoimenta katak iha akontesimentu ne'e, lezada toba mesak iha kuartu laran, bainhira testemuña rona hadak tarutu iha lezada nia kuartu laran, testemuña lori lampra ba leno kedas lezada nia kuartu no haree arguidu iha hela lezada nia kuartu laran no arguidu seidak dada nia kalsa. Depoizde haree tiha arguidu, testemuña fanu kedas nia feen ho oan sira, hodi fó hatene ba arguidu nia inan aman.

Alegasaun finál

Prokuradór konsidera arguidu provadu komete krime abuzu seksuál ba menór hasoru lezada, mezmu arguidu hili direitu nonook maibé lezada konfirma no resforsa mós husi testemuña, tanba ne'e husu bá tribunál atu kondena arguidu ba krime tolu no kada

krime ho pena prizaun tinan 8 no ho total prizaun tinan 24 atu arguidu la bele repete hahalok ne'e iha futuru.

Enkuantu, parte defeza husu ba tribunál atu kondena arguidu tuir koviksaun tribunál nian.

Desizaun

Depoizde avalia faktu hotu ne'ebé produs durante julgamentu tribunál prova katak arguidu provadu komete krime hasoru lezada.

Bazeia ba faktu provadu hirak ne'e tribunál konklui prosesu ne'e no kondena arguidu ho pena prizaun tinan sanolu resin tolu.

3. Krime ofensa ba integridade física simples ho natureza violéncia doméstika.

Nú. Prosesu	: 0202/20.DIDIL
Kompozisaun Tribunál	: Singulár
Juis	: Dra. Maria Solana
Prokuradór	: Dr. Luis Hernanio Rangel da Cruz
Defeza	: Dr. Jonas H. da Costa
Desizaun	: Pena multa US\$40.00

Iha 8 Outubru 2021, Tribunál Distritál Dili prezide julgamentu leitura sentensa ba kazu krime ofensa ba integridade física simples ne'ebé envolve arguidu JS hasoru nia feen, iha Munisípiu Dili.

Akuzasaun prokuradór

Prokuradór akuza katak iha 16 Setembru 2020, iha oras ne'ebé la apura, arguidu baku dala ida iha lezada nia ulun, tebe dala ida iha lezada nia kabun kidun. Antes agresaun ne'e, arguidu ho lezada diskute malu kona-ba arguidu dehan ba lezada atu ba hela ho arguidu nia kuñada, maibé lezada lakohi no hakarak nafatin hela ho prima sira, tanba antes ne'e arguidu ho lezada iha ona problema tanba arguidu namora fali ho feto seluk

no lezada tau kolega mane ida nia foto iha nia profile WA, hodi provoka arguidu, tanba lezada sente fuan moras bainhira arguidu namora fali ho feto seluk. Iha akontesimentu ne'e arguidu ho kondisaun lanu, nune'e lezada tauk no ba hato'o keixa Polisia VPU no lezada mós bá hela iha Uma Mahon durante fulan rua.

Produsaun ba prova sira

Iha julgamentu arguidu hili direitu nonook. Entretantu lezada konfirma faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada, mezmu arguidu hili direitu nonook, maibé lezada konfirma, nune'e atu prevene krime hanesan akontese tan iha futuru husu ba tribunál atu kondena arguidu ho pena prizaun fulan ualu suspende ba tinan ida fulan tolu.

Desizaun

Depoisde avalia faktu sira hotu, tribunál prova katak arguidu baku dala ida iha lezada nia ulun, tebe dala ida iha lezada nia kabun kidun. Bazeia ba faktu provadu hirak ne'e tribunál konklui prosesu ne'e no kondena arguidu ho pena multa US\$40.00 ne'ebé arguidu sei selu US\$1.00 kada loron durante loron 40. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

4. Krime ofensa ba integridade fízika simples ho natureza violénsia doméstika

Nú. Prosesu	: 0210/20.DICMR
Kompozisaun Tribunál	: Singulár
Juis	: Dr. Jose Gonçalves
Prokuradór	: Dr. Luis Hernanio Rangel da Cruz
Defeza	: Dr. Jose da Silva
Desizaun	: Pena multa US\$45.00

Iha 12 Outubru 2021, Tribunál Distritál Dili prezide julgamentu leitura sentensa ba kazu krime ofensa ba integridade fízika simples ne'ebé envolve arguidu RAdR hasoru nia oan feto, iha Munisípiu Dili.

Akuzasaun prokuradór

Prokuradór akuza katak iha 2 Maiu 2020, iha oras tuku 18:00 kalan, arguidu lori sepatu baku dala ida iha lezada nia kotuk laran, baku dala ida iha lezada nia ulun, baku dala ida iha lezada nia kanuruk no baku dala ida iha lezada nia liman loos. Kazu ne'e akontese, bainhira lezada ba iha arguidu nia uma, lezada tama ba uma laran no haree naan manu ne'ebé tasak ona iha hela sanan laran, lezada mós foti naan manu ne'e hodi han, arguidu haree no mosu agresaun hirak ne'e, arguidu no lezada nia inan separa ona.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(c), 35(b) no 36 LKVD.

Produsaun ba prova sira

Iha julagemntu arguidu konfesa faktu hotu iha akuzasaun, arrepende nia hahalok, arguidu deklara liután katak antes akontesimentu ne'e hela sepera ho lezada ho lezada nia inan durante tinan rua, maibé depoisde akontesimentu ne'e di'ak malu fali no agora dadaun hela hamutuk fali ona ho lezada no lezada nia inan ne'ebé nu'udar arguidu nia feen.

Alende ne'e lezada konfirma mós faktu hotu iha akuzasaun no deklara katak di'ak malu ona ho arguidu no depoisde akontesimetu ne'e arguidu la baku ona lezada.

Alegasaun finál

Prokuradór haktuir katak, iha produsaun ba prova arguidu konfesa integralmente ba faktu sira iha akuzasaun no konfirma mós husi lezada, mezmu sira di'ak malu ona maibé tanba haree ba kazu violénsia doméstika ne'ebé agora dadaun aas tebes iha

sosiedade no atu evita kazu hanesan akontese tan iha futuru husu ba tribunál atu kondena arguidu ho pena prizaun fulan 6 suspende ba tinan 1.

Entretantu defeza husu bá tribunál atu aplika pena ne'ebé adekuaudu ba arguidu ho konsiderasaun sira katak arguidu konfesa, arrepende nia hahalok, di'ak malu ona ho lezada.

Desizaun

Depoisde avalia faktu hotu tribunál prova katak arguidu lori sepatu baku dala ida iha lezada nia kotuk laran, baku dala ida iha lezada nia ulun, baku dala ida iha lezada nia kanuruk no baku dala ida iha lezada nia liman loos.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu US\$0,50 durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

5. Krime ofensa ba integridade fízika simples ho natureza violénsia doméstika.

Nú. Prosesu : 0093/20.DICMR
Kompozisaun Tribunál : Singulár
Juis : Dr. Alvaro Maria Freitas
Prokuradór : Dr. Napoleao Soares da Silva
Defeza : Dr. Lito Manuel Exposto
Desizaun : Pena prizaun fulan 3 suspende ba tinan 1

Iha 21 Outubru 2021, Tribunál Distritál Dili prezide julgamentu leitura sentensa ba krime ofensa ba integridade fízika simples ho naturaza violénsia doméstika ne'ebé envolve arguidu ONA hasoru nia feen, iha Munisípiu Dili.

Akuzasaun prokuradór

Prokuradór akuza katak iha 21 Feveireiru 2020, iha oras tuku 21:30 kalan, arguidu tuku dala ida iha lezada nia ulun parte loos, buti dala ida iha lezada nia kakorok, hafoin lezada mós kous sira nia oan hodi lao sai bá tuur tiha iha liur, maibé arguidu kontinua tuir lezada ba liur hodi tuku dala ida iha lezada nia kanuruk. Aktu ne'e rezulta lezada sente moras iha nia ulun, kakorok no kanuruk. Antes agresaun ne'e, arguidu ho lezada diskute malu kona-ba haruka malu atu tein etu no fase bikan, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu deklara katak faktu balun loos no balun la loos, faktu ne'ebé loos mak arguidu tuku dala ida deit iha lezada nia ulun parte loos no la buti lezada nia kakorok no la tuku lezada nia kanuruk, arguidu mós deklara katak arrepende nia hahalok no di'ak malu ona ho lezada.

Entretantu lezada konfirma faktu hotu iha akuzasaun no deklara mós katak di'ak malu ona ho arguidu no depoisde akontesimentu sira di'ak malu fali no to'o agora sei hela hamutuk nu'udar feen laen.

Alegasaun finál

Prokuradór haktuir katak mezmu arguidu konfesa parsialmente, maibé lezada konfirma ho faktu sira iha hotu iha akuzasaun, nune'e husu ba tribunál atu kondena arguidu ho pena prizaun fulan tolu suspendde ba tinan ida.

Entretantu defeza haktuir katak arguidu deklara deit faktu ne'ebé nia komete, arrepende nia hahalok no di'ak malu ona ho lezada, nune'e husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun parte loos, buti dala ida iha lezada nia kakorok, hafoin lezada mós kous sira nia oan hodi lao sai bá tuur tiha iha liur, no arguidu kontinua tuir lezada hodi tuku dala ida iha lezada nia kanuruk.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu arrepende nia hahalok no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun bainhira arguidu la kumpri pena multa refere.

6. Krime ofensa ba integridade fízika simples ho natureza violénsia doméstika

Nú. Prosesu : 0088/17 DIBCR
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Luis Hernanio Rangel da Cruz
Defeza : Dr. Sebastião Amado Nehu
Desizaun : Pena multa US\$100.00

Iha 05 Outubru 2021, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DS hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 24 Abril 2017, maizumenus iha oras tuku 22:00 kalan, arguidu foti kadeira masa viziñu nian baku rahun hotu, no kona mós iha lezada nia liman karuk, matan parte karuk, kabun parte karuk hodi rezulta moras no kanek iha lezada nia isin lolon, iha akontesimentu ne'e lezada grávida hela fulan haat. Antes agresaun ne'e, arguidu ho lezada diskute malu kona-ba arguidu hemu hela tua hamutuk ho nia kolega sira iha viziñu nia uma no lezada bolu arguidu atu troka ampolas eletrisidade kuartu nian ne'ebé keima tiha, maibé arguidu la importa hodi kontinua hemu tua ho nia kolega sira, nune'e mosu agresaun hirak ne'e.

Antes ne'e iha tinan 2013 no 2014, iha data no fulan ne'ebé la apuradu arguidu hemu tua lanu fila mai uma, tuku, tebe no basa lezada maibé lezada la halo keixa.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak iha tempu ne'ebá arguidu halo agresaun hirak ne'e hasoru lezada, tanba lezada koalia lia aat ba arguidu iha nia kolega sira nia oin hodi halo arguidu moe ba nia kolega sira.

Alende ne'e lezada kontinua konfirma faktu hotu iha akuzasaun no deklarata katak depoisde akontesimentu to'o agora arguidu nunka halo ona agresaun hasoru lezada no sira diak malu ona.

Alegasaun finál

Prokuradór haktuir katak tuir loloos arguidu iha maneira seluk atu atua kualker problema tanba lezada hanesan arguidu nia feen no laiha razaun atu halo fali agresaun física hasoru lezada satan lezada ho kondisaun grávida fulan haat, nune'e atu prevene krime ne'e akontese tan iha futuru husu ba tribunál atu aplika pena prizaun tinan ida no suspende ba tinan rua.

Entretantu defeza deklarata katak durante iha produsaun ba prova arguidu rasik deklarata katak iha provokasaun mak hodi hamosu problema, no arguidu la simu ho lezada nia liafuan ne'ebé la diak ne'ebé hateten ba arguidu iha ema barak nia oin. Lezada konfirma katak arguidu lanu mak lezada provoka ho diskusaun maka mosu agresaun husi arguidu hasoru lezada nune'e defeza husu ba tribunál atu fó kastigu ne'ebé kaman ba arguidu, tanba depoisde akontesimentu arguidu ho lezada hela hamutuk ona no lezada deklarata mós katak arguidu to'o agora la halo ona agresaun hasoru nia feen.

Desizaun

Depoisde avalia faktu sira hotu, tribunál prova katak arguidu foti kadeira masa viziñu nian baku rahun hotu, no kona mós iha lezada nia liman karuk, matan parte karuk, kabun parte karuk hodi rezulta moras no kanek iha lezada nia isin lolon, iha akontesimentu ne'e lezada grávida hela fulan haat.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa no di'ak malu ona ho lezada. Ho nune'e tribunál konklui

prosesu ne'e no kondena arguidu ho pena multa US\$100.00 ne'ebé arguiua sei selu US\$1.00 kada loron, durante loron 100. Tribunál mós fiksa pena alternativa durante loron 66 prizaun bainhira arguida la kumpri pena multa refere.

7. Krime danu ho violénsia

Nú. Prosesu : 0105/20 DINFT
Kompozisaun Tribunál : Koletivu
Juis : Dra. Ana Paula Fonseca, Dra. Maria Solana, Dr Ivan S. A. Gonçalves
Prokuradór : Dr. Domingos Barreto
Defeza : Dr. Juvinal Yanes
Desizaun : Pena prizaun tinan ida suspende ba tinan ida

Iha 06 Outubru 2021, Tribunál Distritál Dili prezide julgamentu leitura sentensa ba krime danu ho violénsia ne'ebé envolve arguidu Cristiano dos Santos, Jufri Samuel da Silva no Goaldinho Sousa Soares hasoru lezada Milca de Carvalho Correia, iha Bairro Formosa, Munisípiu Dili.

Akuzasaun Prokuradór

Prokuradór akuza katak iha 29 Agostu 2020, maizumenus iha oras tuku 2:30 madrugada, lezada hamutuk ho nia família partisipa iha festa prenda iha Bairro Formosa, bainhira festa nain dehan festa ensera ona no ida ne'e música última, rona ida ne'e lezada ho nia família sai atu ba sae kareta derepente, arguidu sira asaltu malu no tuda malu iha festa refere. Lezada ho família halai tama ba festa fatin hodi taka odamatan, lakleur lezada sai fali mai hakbesik ba nia kareta tama ba kareta laran derepente arguidu sira halai tuda kareta no lezada iha hela kareta laran hateke sai ba haree hetan arguidu Cristiano uja jaket kor azul no lezada hakruk ba kareta nia volante oin tanba tauk fatuk mai kona kareta nia vidru nakfera no rahun tun hotu.

Prokuradór akuza arguidu sira kontra artigu 260 KP kona-ba danu ho violénsia ho moldura penal tinan 4 to'o tinan 12 prizaun.

Produsaun ba prova sira

Iha prosesu julgamentu, arguidu sira konfesa faktu hotu iha akuzasaun no rekoñese ba hahalok ne'ebé sira halo, arguidu sira mós deklarar katak arrepende sira nia hahalok no promete ba tribunál atu la halo tan hahalok hanesan ne'e iha futuro no depoisde akontesimentu arguidu sira tau osan hamutuk US\$947.00 hodi hadia kareta ne'ebé sira

tuda, alende ne'e sira mós halo akordo dame malu tuir kultura Timor nian.

Alende ne'e lezada mós konfirma faktu hotu iha akuzasun no depoisde akontesimentu sira tau osan hamutuk hodi selu kareta ne'ebé hadia iha ofisina (bengkel) no sira mós dame malu ona tuir lisan Timor nian.

Alegasaun finál

Prokuradór haktuir katak arguidu sira provadu komete krime danu ho violénsia, tanba arguidu sira mós konfesa faktu hotu iha akuzasun no sira selu ona prejuizu ne'ebé lezada infrenta nune'e prokuradór mantein ho akuzasun hodi kontinua kondena arguidu sira tuir artigu 260 KP.

Enkuantu defesa husu ba tribunál atu kondena arguidu sira ho pena ne'ebé kmaan ho konsiderasaun sira katak arguidu sira konfesa, arepende sira nia hahalok no selu ona osan ho montante US\$947.00 hodi hadia kareta, no promete sei la komete tan krime hanesan iha futuru.

Desizaun

Depois de avalia faktu sira hotu, tribunál prova katak faktu hotu iha akuzasun ne'e provadu, bazeia ba faktu provadu sira no tetu mós sirkunstánsia atenuante sira hanesan arguidu sira konfesa, arrepende sira nia hahalok, selu ona osan ho montante US\$947.00 hodi hadia kareta, no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu sira ho pena prizaun tinan ida no suspende ba tinan ida.

8. Krime Ameasa

Nú. Prosesu	: 0004/20/ALLLR
Kompozisaun Tribunál	: Singular
Juis	: Alvaro Maria Freitas
Prokuradór	: Dra. Benvinda do Rosario
Defeza	: Dr. Fernando L. Carvalho
Desizaun	: Omologa dezisténsia keixa

Iha 07 Outubru 2021, Tribunál Distritál Dili prezide julgamentu leitura sentensa ba krime ameasa ne'ebé envolve arguidu José Madeira nu'udar membru PNTL hasoru lezada Domingas da Costa nu'udar arguidu nia tia, iha Talitu, Munisipiu Aileu.

Akuzasaun Prokuradór

Prokuradór akuza katak iha 8 Janeiru 2020, maizumenus iha tuku 10:00 dadeer, arguidu ba kesi nia karau iha lezada nia uma oin no karau ne'e besik malu ho lézada nia bibi nune'e karau nia talin bobar lezada nia bibi. Lezada fó hatene ba nia oan Pedro para kore tia karau hodi ba kesi dook tiha. Derepente arguidu nia oan Ambere ba kesi fila fali sira nia karau ne'e besik lezada nia bibi ho ida ne'e arguidu mosu mai hodi diskute malu ho lezada no arguidu koalía ba lezada katak "*ó mangame hau baku ó to'o o nia mi sai, ó nia oan talu kiik ne'e mós hau baku mate hotu*". Rona ida ne'e halo lezada sente tauk no la hakmatek iha ninia moris no prejudika lezada nia liberdade.

Prokuradór akuza arguidu kontra artigu 157 KP kona-ba krime ameasa ho moldura penál to'o tinan 2 ka multa.

Produsaun ba prova sira

Iha julgamentu, arguidu deklara katak faktu ne'ebé akuza ba nia laloos hotu, arguidu mós deklara katak nia konsidera lezada hanesan nia tia nomós nu'udar edukadór ida nune'e nia nunka hasai liafuan aat hasoru lezada. Arguidu mós deklara katak nia iha duni karau maibé nia seidak ba kesi karau ne'e no bainhira iha dalan foin hodi ba kesi maka lezada hakilar no tolok hasoru arguidu katak "*asu aman la bele lori karau mai kesi iha ne'e .*"

Entretantu lezada konfirma faktu hotu iha akuzasaun no deklara katak arguidu tolok no ameasa duni lezada, nune'e halo lezada tauk hodi ba hato'o keixa.

Depoisde produsaun ba prova arguidu no lezada deside atu dada de'it kazu ne'e, tanba antes ne'e sira di'ak malu ona no sei iha relasaun família, nune'e bazeia ba artigu 262 Kódigu Prosesu Penál (KPP) kona-ba tentativa ba konsiliaun, tribunál konkorda ho pedidu husi arguidu no lezada.

Alegasaun Finál

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezistencia husi lezada, nune'e tribunál omologa akordu dame ne'e.

Atu hetan informasaun liutan bele kontaktu:

Ana Paula Marçal

Diretora Ezekutiva JSMP

Email: ana@jsmp.tl

Telefone: 77040735

Website: <https://jsmp.tl/>